

弘

簡

錄

弘簡錄卷五十二

明刑部員外郎仁和邵經邦弘齋學

皇清翰林院侍講學士四世孫遠平校閱

文翰 唐十之二

陳子昂

蜀丘均

王無競

趙元

陸餘慶

盧藏用

弟若虛

王勃

兄勣勣助

楊炯

盧照隣

駱賓王

元萬頃

范履冰苗神客周思茂胡楚賓

李適

許元旦

劉允濟

沈佺期

弟之悌之孫

閻朝隱

尹元凱

喬知之

弟儼

富嘉謨

吳少微

劉憲

父思立王適司馬鎰梁載言

張鷟

李邕

王翰

呂向

孫逖

孫簡

杜甫

祖審言

賀知章

李白

張旭

王維

鄭虔

鄭杲如

蘇源明

梁肅

陳子昂字伯玉梓州射洪人六世祖太樂居新城梁武帝時爲
郡司馬父元敬世席高貴歲饑出粟賑濟多至萬石舉明經調
文林郎子昂少務弋博倚家富尚氣決年十八未知書旣冠入
鄉校感悔向學痛自刻勵遂工於文唐興天下祖尚徐庾浮艷
及是始變歸於雅正初爲感遇詩三十八章司功王適一見驚
曰是必爲海內文宗乃請納交凡所論著當世舉以爲法文明
初登進士上書武后畧曰頃者三輔荒饑百姓薦饑薄河而右
惟有赤地循隴以北不逢青草父兄轉徙妻子流離白骨縱橫
阡陌無主至於蓄積猶可哀傷先帝盛駕長驅千乘萬騎何從
仰給山陵穿復必資徒役率糴弊之衆發近畿之徭督老扶稚
鑿山輦石彫吐遺噍有不堪其困則逸而爲盜賊可不深圖哉
且天子以四海爲家今景山崇秀北對嵩卬右眎汝海居視融

之故地。連太昊之遺墟。圖陵之美。復何以加。况連河之中。天地
交會。北有太行之險。南有宛葉之饒。太原唐鉅萬之倉。洛口儲
天下之粟。今乃捨而不顧。棄安履危。曲徇小節。爲陛下不取也。
后覽之奇。其才名見金華殿。占對慷慨。擢麟臺正字。垂拱初。后
問調元氣。當以何道。因勸后興明堂。太學曰。臣聞元氣者。天地
之始。萬物之祖。王政之大端也。天地莫大於陰陽。萬物莫靈於
人。王政在先。安人人。安則陰陽和。天地平。元氣正。是以先王養
成羣生。順若天德。使人樂其業。甘其食。美其服。然後天瑞降。地
符升。風雨時。草木茂。若顓頊唐虞之世。昭明協和。於變時雍。和
之得也。夏商之衰。桀紂昏暴。陰陽乖行。天地震怒。和之失也。迨
周文武。誠信忠厚。加于百姓。故成康刑措四十餘年。天人方和。
遇幽厲亂常。苛慝暴虐。銷鑠天地。川氣沸騰。人用愁怨。近隋楊

帝恃四海之富。鑿渠決河。自伊洛屬之維揚。疲生人之力。洩天地之藏。逆元氣之理。故身死人手。宗廟爲墟。陛下舍天地之德。日月之明。眇然遠思。欲求太和。會合昔者。天皇大帝。攬元符封太山。然未建明堂。享上帝。殆留此盛德。以發揮於陛下也。臣聞明堂有天地之制。陰陽之統。四時五行。八風十二月。二十四氣。二十八宿。莫不率備。王者政失。則災政順。則祥。臣願陛下爲唐虞萬世之業。相國之南郊。興建明堂。與天下更始。按周禮。月令而成之。不越數。非且見太平。又言太學者。政教之地。君臣上下之所取則。俎豆揖讓之所興起。從古於此。以得賢臣。陛下方興大化。而太學久廢。堂皇埃蕪。詩書不聞。雖欲睦人倫。興治綱。失之本而求之末。不可得也。願引冑子使歸太學。后名見復令中書省賜筆札。條上利害。對以三事。其一言九道使巡按天下。未

能悉得其人。今使尚未出。道路之人。皆已指笑。欲望進賢退不肖。不可得也。陛下必欲使百姓知天子夙夜憂勤之。羣臣知考績而任之。姦暴不逞。知將除之。宜擇仁可以恤孤。明可以根滯。剛不避彊。禦智足以照姦者。以爲使。則輪軒未動。天下已翹然待之矣。其二。刺史縣令。政教之首。陛下布德施令。必待其人。謹宣而奉行之。有如不得。徒委棄牆屋。百姓安得知之。一州得才。刺史十萬戶。賴其福。得不才。刺史十萬戶。受其困。今吏部但計資考。不求賢良。萬有一不次擢用。則天下翫然相謗。悉以庸人叨側其間。教化陵遲。實在于此。其三。天下有危機。禍福因之而生。機靜。則有福。動。則有禍。百姓安則樂生。不安則輕生。五六年來。自劔南。益。河。隴。舉山東河北。青徐。曹汴。滄瀛。趙鄭。或困水旱。或頓兵疫。夫妻不得安。父子不相養。向賴陛下憫其失職。凡兵

成調發一切罷之。可謂能靜其機也。然臣恐自今有貪違利說
陛下以廣地疆武。此機一動。則構禍不小。宜修文德去刑罰。勸
農桑以息疲民。俾蠻裔知中國有聖王。必累譯至矣。時吐蕃九
姓叛詔田揚名發金山道十姓兵討之。有功。因請入朝。后責其
嘗不奉命。掣破回紇。不聽。因上疏言。國家能制十姓者。由九姓
獨今九姓叛亡。北蕃喪亂。君長無主。回紇殘破。殲北諸姓。已非
國有。惟金山諸蕃共爲形勢。今若遣還揚名。不使入朝。恐非羈
縻之長策也。夫戎有歡心。親之則順。疑之則亂。既阻其善。意內
乏國家親信之恩。外有回紇報讐之患。懷不自安。烏駭狼顧。恐
河西諸蕃自此拒命。有如勃起。招合遺散。遼患未可量。此國家
大機不可失也。其後吐蕃果入寇。終后世爲患最甚。后方謀開
蜀山。由雅州道剪生羌。因以襲吐蕃。又上書以七驗諫止之。文

載舊史后復召見使論爲政之要乃奏八科一措刑二官人三知賢四去疑五招諫六勸賞七息兵八安宗子文多不錄俄遷右衛曹參軍上周受命頊以相悅后然終以其言論諱切聞輒報罷母喪服終擢右拾遺多病不樂居職表武攸宜討契丹參謀次漁陽攸宜輕易無將略前鋒敗衆軍震恐于昂諫曰太后發天下兵以扈大王安危成敗端在此舉安可忽易今法制不立如小兒戲提重兵精甲頓之境上恐有朱亥竊發之變願審智愚量勇怯度衆寡以長攻短分麾下萬人爲前驅契丹小醜指日可禽攸宜謝以儒者不納居數日復進計攸宜怒徙昇軍曹參軍子昂知不合不復言俄有同州下邳人徐元慶父爲縣尉趙師韜所殺後師韜擢御史元慶變姓名爲驛家傭僦師韜于路手殺之議者多其孝烈欲捨勿罪子昂建議國法專殺

者死宜先正國法。後旌其閭墓以褒孝義可也。當時咸以其說爲是。時父尚在。聖曆初爲縣令。段簡所尋表解官歸侍簡食。暴求賂餉錢。嫌薄。搆捕憂死獄中。年四十三。爲人貌質野性。獨少威儀。居父喪不離冢次。每哀慟聞者爲泣。篤于友義。輕財好施。有集十卷。大曆中。節度李叔明爲立旌德碑其學堂。在梓州。至今猶存。子光終商州刺史。孫易甫簡甫皆位御史。後又有成都人閻丘均亦以文章著名。景龍中安樂公主薦拜太常博士。貶循州司倉叅軍卒。有集十卷。

王無競字仲列。宋太尉弘遠裔。徙居東萊。父侃。棣州司馬。家富于財。無競少有才華。與子昂房融齊泰之遊。擢下筆成章科。聲名藉甚。調樂城尉。三遷監察御史。改殿中侍御史。頗負氣豪縱。當侍班。面斥宰相宗楚客。楊再思離立。偶語楚客怒。徙爲太子

舍人神龍初復詆權幸出爲蘇州司馬坐張易之交往貶廣州司戶卒年五十四

趙元字貞固河間人祖揆號通儒補黎陽長徙居汲元少負志略好論辨不求聞達初游雒陽士爭慕爵后方稱制調宜祿尉到職非公事不言彈琴時藥不改隱者之操自傷位不配才退處于家年四十九卒其友魏元忠孟詵宋之問崔瑒等共諡昭夷先生子少微亦與子昂之子光相善俱以文稱

陸餘慶蘇州人右衛將軍珣孫方雅有祖風已冠名未顯兄玄表惜之始感激閉戶誦書三年以博學稱雅善趙元藏用子昂審言之問畢構郭襲微司馬承禎釋懷一十人爲文字交雖才不逮子昂等而風流敏辯過之舉制策甲科補蕭縣尉遷陽城令咸有清譽后方封嵩山以辦具擢監察御史聖曆初歷靈勝

二州刺史党頊誘北蕃寇邊喻以恩信蕃酋內附遷殿中侍御史鳳閣舍人后嘗命草詔殿上時斜倖大行憚利懼禍不能措一詞降左司郎中久之封廣平郡公太子右庶子以道自將於寒品晚進必悉力薦藉人有過輒面折退無違言仕雖不赫奕訖無悔尤開元初爲河南北宣撫使所薦孫逖韋述蔣洌達奚珣後皆名士遷大理卿終太子詹事諡曰莊

盧藏用字子潛承慶姪孫父礪有才名官魏州司馬藏用少以辭學著稱舉進士不調著芳草賦見意與兄徵所偕隱終南少室學練氣辟穀之術登衡廬徜徉岷峨與陳子昂趙元友善長安中徵拜左拾遺姚元崇奏掌璽武道書記還應制科爲濟陽令神龍中累轉起居中書二舍人兼知制誥素善筮龜九宮術恐世俗惑之有非至理特著析滯論略曰夫甲子所以配日月

律曆所以通歲時金木所以備法象著龜所以分吉凶聖人以
此神明德行輔助謀猷存之則協贊成功執之則凝滯於物消
息之義其在茲乎古之爲政者刑獄不濫則人壽賦歛獨省則
人壽法令有常則國靜賞罰得中則兵強所以體者士之所歸
賞者士之所死禮賞不他則士爭先苟違此途雖卜時行刑擇
日出令必無成功自叔世外流俗多儆倖競稱怪力乎訟詭言
屈政教而就孤虛棄信賞而從推步附會前史變易舊經依託
空文以爲徵據習俗乖謬增減蓄疑且往聖以甲子興師往亡
用事何往不濟至若兵強將智粟積城堅雖復屢轉寇剛頻移
太歲坐推白虎行計貪狠不時日而事利不卜筮而事吉故太
公犯雨逆天時也韓信背水乖地利也削樹而斬龐涓舉火而
屠張卬未必暗同歲德冥會日遊俱運三門並占四殺至於杜

郵齒劍垓下悲歌金雞玉鶴方爲楚國之殃萬畢枕中適構淮
南之禍刻符指盜反更亡身被髮邀神翻招滅族與咸斗赭鞭
不禮亦伏之運築城斷岡何救素靈之哭火災不驗卿竈無力
以窺天起乘階凶王孫取監於觀德此並經史陳迹賢聖通規
方審知言詎宜執滯景龍中爲吏部侍郎當時目爲隨駕隱士
以素無挺特多爲權要所逼頗慕公道遷黃門侍郎兼昭文館
學士轉尚書右丞晚節赳赳貴倖阿附太平公主以奢靡淫縱
獲譏故司馬承禎更以爲仕宦捷徑旋復配流嶺表開元初起
爲黔州長史未行卒年五十餘無子有集二十卷生平工草隸
大小篆好琴善奕遇子昂貞固早卒厚撫其子人以是稱弟
若虛多才博物隴西辛怡諫獲異鼠豹首虎膽大如拳以爲奇
而賦之名爲鼯鼠若虛辨其非此在說文所謂鼯鼠豹文而形

小一坐驚服終起居郎集賢院學士

王勃字子安通之孫六歲善文辭九歲得顏師古注漢書讀之作指瑕以擿其失與兄勔勗才藻相類杜易簡與父福時友稱爲王氏三珠樹麟德初未冠上書闕內巡察劉祥道表薦于朝對策高第授朝散郎乾封初上宸遊東岳頌又上乾元殿賦沛王聞其名召署府修撰論次平臺秘畧書成王愛重之戲爲闕雅文檄高宗見而怒曰是且交構命斥出府客遊劔南嘗登葛嶺山曠望慨然思諸葛之功賦詩見情聞虢州多產藥求補參軍倚才陵藉僚吏嫉之坐殺官奴當誅遇赦除名俄父左遷交趾令往省渡海驚悸而卒年二十九初道出鍾陵正遇重陽都督大宴滕王閣宿命其婿作序以誇客因出紙筆徧請諸客莫敢當至勃不辭都督怒起更衣令吏伺落筆輒報一再報語益

奇乃嬰然曰天才也遂成文極歡而罷其屬文無滯思先磨
墨數升酣飲引被覆而寤而起援筆成篇不易一字時人稱爲
腹藁尤喜著書有文集三十卷周易發揮五卷補完祖過所缺
逸者又精推步嘗作大唐千歲曆言亦不驗至武后時李嗣真
本其說推黃帝至漢五運適周土復歸唐唐應繼周漢不可承
周隋短祚魏晉以降皆非正統乃五行沴氣請以周漢爲二王
後而廢周隋中宗復用之天寶中有崔昌者又采勃舊說上五
行應運曆請承周漢廢周隋爲閏李林甫集公卿議學士衛包
舍人閻伯珣表言都堂集議之夕四星聚於尾天意昭然矣於
是玄宗下詔黜隋以前帝王廢介鄴公尊周漢爲二王後以商
爲三恪京城起周武王漢高祖廟授昌太子贊善大夫包司虞
員外郎及國忠自稱隋宗建議復用魏爲三恪周隋爲二王後

復鄒介二公貶昌伯瑛三人 勛與助皆登進士勛長詩中爲
鳳閣舍人加弘文館學士兼知天官侍郎素善劉恩禮用爲箕
州刺史勛至潭州刺史咸坐禁連權累被誅神龍初復官 助
字子功七歲喪母哀感隣里居父憂毀骨立服除爲監察御史
裏行少弟勛勛亦有文

楊炯華陰人伯祖虔威武德中官至右衛將軍炯初聰敏博學
善屬文舉神童拜校書郎崇文館學士儀鳳中太常博士蘇知
幾表請更制冕服別立節文勛下有司詳議炯引虞書日月星
辰山龍華蟲作會宗彛藻火粉米黼黻絺繡其所從來尚矣迨
及周公多才化洽制禮功成作樂孔宣將聖尚且因周冕而不
改先王法服悉從此出今議者云麟鳳有四靈之名龜有負圖
之應雲有紀官之號水有盛德之祥此蓋別表休徵初無比象

然則皇王受命天地興符可畢陳于法服乎。雲者龍之氣也。水者藻之自生。何假別爲章目。又制鷩冕八章。三公服之。鷩者太平之瑞。非三公之德。鷩者鷩鳥。祇可辨群刑之職。焦者猛獸。可旌武臣。又毳冕六章。三品乃得服之。與王同。而三公獨不得同王之袞冕。豈惟顛倒衣裳。抑亦自相矛盾。其黼冕四章。五品服之。考之於古。則無其名。驗之於今。則非章首。此皆不經之甚。由是竟寢。天后初遷詹事司直。坐度威孫神讓。預敬業謀。左轉梓州司法叅軍。秩滿。遷盈川令。至官殘酷。人吏動不如意。輒榜殺之。無何卒。官中宗以舊寮。追贈著作郎。有文集三十卷。名與王勃。盧照隣。駱賓王。齊海內。稱爲四傑。嘗自謂人吾愧在盧前。恥居王後。重之者崔融。李嶠。張說。融謂勃。文章宏逸。有絕塵之跡。固非常流所及。炯與照隣。可以企及。說謂楊盈川。文思如懸。

河注水酌之不竭其稱恥居王後信然愧在虛前謙也

盧照隣字昇之范陽人年十餘歲就曹憲王義方投蒼雅并經史及長博學善屬文初授鄧王府典籤王愛重之比爲司馬相如後調新都尉因染大風疾退處太白山得方士玄明膏餌之會父喪號嘔血山由是轉篤客東龍門山布衣糲食裴瑾之章方質范履來咸衣食之疾甚手足皴廢徙居陽翟之具茨山買園數十畝豫爲墓偃卧其中著釋疾五悲等文五悲者已有親遭患遠難已尚儒遭世尚法已好清淨遭時競悻已有病遭上封禪已有才遭廢不用頗有騷人之風甚爲文士稱重以疾沉痾不堪其苦乃自投潁水之濱與親戚相別而死時年四十有集二十卷兄光乘亦知名長壽中爲隴州刺史

駱賓王義烏人六歲善屬文尤妙五言詩常作帝京篇當時以

絕唱初爲道王府典籤高宗時歷武功長安二傅上書武后
數言政事下除臨海縣丞怏怏失志棄官而去徐敬業起兵署
爲府屬軍中筆札皆出其手傳檄天下數后之罪后得而讀之
初但嘻笑至一杯之土未乾六尺之孤安在瞿然曰誰爲之或
以名對后曰宰相安得失此人敗後亡命不知所終中宗詔求
其文有兗州人郝雲卿集爲十卷盛傳於世

元萬頃後魏京兆王子推裔祖白澤武德中仕至梁利十一州
都督封新安公萬頃起家太子通事舍人從李勣征高麗爲掌
書記使草檄讓高麗譏其不守鴨綠之險高宗聞之投徙嶺外
赦還爲著作郎文辭敏捷武后召與周王府戶曹參軍范履冰
苗神客太子舍人周思茂右史胡楚賓入內供奉凡撰列女傳
臣軌百僚新戒樂書等數千卷至朝廷疑議表疏皆密使參決

以分宰相權故時謂北門學士然放達不治無儒者風累遷

閣侍郎坐誅履冰河內人垂拱中歷鸞臺天官二侍郎春官

尚書同鳳閣鸞臺平章事兼修國史載初年坐舉逆人被殺

神客東光人終著作郎思茂貝州漳南人與弟思鈞早知名累

遷麟臺少監崇文館學士垂拱中下獄死楚賓秋浦人屬文

敏甚必酒中然後下筆高宗常以金銀杯酌飲之文成輒賜焉

家居率沈飲無留貽費盡復入得賜出類以爲常性重慎未嘗

語禁中事雖甚醉人問之燕視不答尋兼崇賢館直學士卒

李適字子至萬年人登進士調倚氏尉會修三教珠英與李嶠

崔融薛稷韋元旦劉允濟沈佺期宋之問同朝隱尹元愷富嘉

謨劉憲盧藏用李乂岑義馬懷素武平一徐堅徐彥伯皆預書

成遷戶部員外郎兼修文館學士凡天子饗會游豫咸得從之

春幸梨園並渭水祓除夏宴葡萄園賜朱櫻秋登慈恩獻菊花
酒冬幸新豐歷白鹿觀上驪山賜浴湯池給香粉蘭澤從行給
翔麟馬品官黃衣各一帝有所感卽賦詩學士皆屬和當時人
所歆慕然皆和役佻倖忘君臣禮法惟以文華取幸睿宗時待
詔宣光閣再遷工部侍郎卒年四十九贈貝州刺史所撰有九
經要句

韋元旦萬年人祖澄越王府記室撰文誠元旦擢進士補東阿
尉遷左臺監察御史與張易之姻貶感義尉復因韋后妹妻元
旦舅陸頌得名爲主客員外郎至中書舍人

劉允濟河南鞏人齊彭城郡丞職六世孫少孤事母孝工文辭
與王勃齊名舉進士補下邳尉遷著作佐郎采魯哀公後十二
世接戰國爲魯後春秋獻之遷左史兼直弘文館又奏明堂賦

述武后功德除著作郎爲來俊臣飛構貶大庾尉復爲著作佐郎修國史遷鳳閣舍人左除青州長史有清白稱內憂服除召爲修文館學士卒

沈佺期字雲卿相州內黃人及第授協律郎遷通事舍人給事中善屬文尤長七言之作名齊宋之間時號沈宋再轉考功員外郎與劉允濟宋之間閻朝隱傾心媚附張易之等及敗坐流驪州稍遷台州錄事參軍入計得召見中宗拜起居郎兼修文館直學士侍宴內庭詔學士等舞回波佺期爲弄辭悅帝賜牙緋歷中書舍人太子少詹事卒弟全交全宇皆有才文章多不逮自魏建安後訖江左詩律屢變至沈約庾信以音韻相婉附屬對精密佺期之間更加靡麗回忌聲病約句準篇如錦繡成交學者宗之遠近傳布武平一爲纂集各成十卷傳于代

宋之問字延清汾州人父令文富文辭且工書有力絕人能止牛觸世稱三絕高宗時爲左驍衛將軍東臺詳正學士之間偉儀貌雄辨英發尤善五言詩當時無能出其右武后召與楊炯分直習藝館授洛州叅軍轉尚方監丞左奉宸內供奉后游洛南龍門詔從臣賦詩左史東方虬詩先成后賜錦袍俄頃之間狀后覽之嗟嘆更奪袍以賜張說嘗評其文如良金美玉無施不可坐易之黨流瀧州逃歸匿張仲之家微知與王同皎謀殺武三思卽令弟之惡報冉祖雍令上急變以求贖罪擢鴻臚主簿天下醜之景龍中遷考功員外郎兼修文館學士復諂事太平公主及安樂權盛又往諧結太平疾之發其知貢舉時昧餉狼藉下遷越州長史自力爲政窮刻溪山水置酒賦詩睿宗立與祖雍並流嶺南賜死弟之悌亦踰舅長八尺開元中歷劔

南節度使太原尹宋為贊授以總管擊之賊服其猛遂平之
之憑為播州司兵叅軍精草隸世謂皆得父一絕祖雍江夏王
道宗甥及第有文名歷中書舍人刑部侍郎

閻朝隱字友脩趙州樂城人少與兄鏡幾弟仙舟皆以文藻著
名連中進士孝悌廉讓科補陽武尉遷太子舍人中宗在東宮
得幸性滑稽屬辭奇詭為武后所賞累遷給事中仗內供奉后
有疾令往禱少室山乃沐浴伏身臥盤為犧請代還奏大見褒
賜其諡依類此景龍初貶崖州遇赦還遷著作郎先天中為祕
書少監復坐事貶通州別駕卒張說嘗評其文如觀粧麗服燕
歌趙舞觀者忘疲若類之風雅則罪人矣 尹元凱瀛州樂壽
人初為慈州司倉參軍坐事免棲遲山林不求仕進垂三十年
徵拜右補闕卒於邢州司馬

喬知之同州馮翊人父師望尚高祖女廬江公主生三子並以文詞知名知之尤稱才俊所作篇詠人多諷誦則天時累除右補闕遷左司郎中有侍婢曰竊娘美麗善歌舞爲武承嗣所奪知之怨惜因作綠珠篇以寄情寄送與婢婢感憤自殺承嗣大怒因諷酷吏羅織殺之殘其家弟侁開元初爲兗州都督備預修三教珠英長安中卒於襄陽令

富嘉謨雍州武功人與新安人吳少微俱登進士長安中轉晉陽尉復與少微同僚及主簿魏郡人谷倚並負文辭稱北京三傑當時方尚徐庾咸以爲宗凡文士碑頌浮偃不競氣調卑劣三人獨本經術雅厚雄邁一時丕變爭競號吳富儼嘉謨所撰雙龍泉千蠲谷二頌少微撰崇福寺鐘銘詞最高雅作者推重并州長史張仁亶待以殊禮中興初韋嗣立薦嘉謨少微並爲

左臺監察御史素相契合及嘉謀病卒少微亦臥病聞之大慟遂殞各有集五卷張說嘗評其文如孤峯絕岸壁立萬仞濃雲鬱興震雷迅發誠可畏也若施于廊廟咳矣倚後流寓客死文章遺失少微子鞏開元中爲中書舍人

劉憲字元度宋州寧陵人父思立高宗時爲御史河南北大旱詔遣中丞崔謚等分道賑贍思立建言蠶麥方殷遣使撫巡所至勞擾又須立簿最稽出入往返停滯妨廢益廣望且貴州縣給貸須秋遣使詔可武后時遷考功員外郎後卒于官后始議明經加帖進士加試雜文敕吏部糊名考判求高才惟憲與王適司馬銓梁載言入第二等憲初擢進士調河南尉進左臺監察御史天授中來俊臣構貶潯水令復召爲給事中轉中書舍人吏部侍郎又坐張易之出爲渝州刺史再入爲太僕少卿修

國史兼修文館學士玄宗在東宮遷太子詹事勸以崇尚墳典
光耀盛德發揚令問安靜身心保康邦國非在尋章摘句要通
大意而已時願納之卒贈兗州都督有文集三十卷 適幽州
人終雍州司功參軍 鉉河南人神龍初終中書侍郎事繼母
孝奉祿不入私舍與弟銓伯父希象皆歷殿中侍御史希象剛
直不諂終主爵員外郎 載言聊城人歷鳳閣舍人專知制誥
終懷州刺史撰具員故事十卷十道志十六卷

張鷟字文成深州陸澤人兒時慧悟絕倫夢一大鳥紫文止其
廷大父曰吾聞鳳五色赤文今紫文鷟鷟也是子以文章瑞朝
廷命以鷟名及長博覽羣書調露初登第考功蹇味道稱所對
策天下無雙授岐王府參軍又應下筆成章才高位下詞標文
苑等科凡八舉皆冠調長安尉遷鴻臚丞四參選部判策皆最

員半千稱其文辭猶青銅錢萬選萬中時號青錢學士劉奇薦
爲監察御史性褊躁不持士行語多譏刺時政正人端士罕所
許與姚崇尤惡之開元初爲同僚李全交劾貶嶺南李日知以
爲太重得內徙後終司門員外郎其爲文下筆敏速浮鹽少理
多論著頗雜詠諧遠近皆誦習之中人馬仙童自歎嘆還言齒
間文成在否國有此人何不能用新羅日本東土諸蕃使至必
出金貝以購其文聲名遠播如此

李邕字泰和江都人父善方雅滑勁有士君子風淹貫古今人
號書麓顯處中累擢崇賢館直學士兼沛王侍讀沛王府記室
出爲涇城令坐與賀蘭敏之善流姚州遇赦還居汴鄭間以文
選授諸生四遠而至邕少知名病父文選注釋事而忘意欲有
所更乃附事見義兩書並行弱冠見李嶠願讀祕書假以直監

未幾辭去嶠試問與篇隱快了辯如響乃與張廷珪薦邕文高
氣直堪任諫諍召拜左拾遺中丞宋璟勅張昌宗等反狀武后
不應邕立階下大言璟所陳社稷大計陛下當聽居色解即可
璟奏由是著名中宗時嘗言鄭普思陛下誠以其術可致長生
服神鬼成佛道則古者與鳩氏秦皇漢武梁武永有天下而墨
翟千寶各獻其主非陛下今日可得自古堯舜稱聖皆在人事
平章敦睦不聞以鬼神道治天下不納頃坐善張柬之出爲南
和令再貶富州司戶內難平召拜左臺侍御史彈劾任職人頗
憚之尋與崔日知捕譙王重福支黨遷戶部員外郎又坐交崔
日用貶舍城丞玄宗卽位徵爲戶部郎中廷珪姜皎援爲御史
中丞姚崇疾其險躁左遷括州司馬起爲陳州刺史帝封泰山
獻賦行在悅之自謂且相素輕張說有讐人告邕賊逆下獄當

死許昌男子孔璋。願代之。上書訟。剛毅忠烈。難不苟免。往折
二張。挫韋氏。姦謀沮解。有功於國。且能拯孤救乏。家無私聚。伏
惟陛下使邕率德改行。與林父曲逆之功。臣得瞑目附禽息北
郭之義。疏奏因得末減。貶欽州遼化尉。流瑋死嶺南。後從中人
楊思勗討賊有功。徙澧州司馬。開元末起。歷括滄滑三州刺史。
興利除害。甚有能政。上計京師。後生以早有重名。久罹外徙。至
十百聚觀中。官索所爲文。填塞門巷。然以讒媚者多。不得留中。
出爲北海太守。生平長於碑頌。前後求請不可計。由是李北海
之名播于天下。然性矜肆豪放。畋游自肆。細行不檢。盧藏用謂
如干將莫邪。難與爭鋒。但虞傷缺耳。後遺左驍衛參軍柳勛馬
勤告杜有隣謀反。引邕爲證。云嘗以休咎語宰相李林甫。因傳
以罪就郡。杖殺之。年七十有文集七十卷。代宗贈祕書監。杜甫

作八哀詩以傷之

王翰字子羽晉陽人少豪健恃才喜酒登進士并州長史張嘉貞奇其才禮接甚厚翰感之立於席上撰樂詞以敘情神氣豪邁後張說至禮益加復舉直言極諫調昌樂尉又舉超拔羣類除秘書正字說詐其文如瓊林玉笋爛然可珍而多珎缺擢通事舍人駕部員外郎家畜聲伎櫪多名馬發言立意自比王侯顧指儕類人多嫉之說罷出爲汝州長史徙仙州別駕至郡日聚英豪文士祖詠杜華輩從禽擊鼓恣爲歡賞貶道州司馬卒有文集十卷

呂向字子回涇州人少喪母父爰客于遠方託外祖母隱陸渾山賣藥自給強志于學卽市閱書遂通古今工草隸能一筆環寫百字若策髮然世號連錦書開元十五年召入翰林供奉兼

集賢院校理侍太子諸王爲文章嘗奏美人賦諷帝釋天下姝
好歲內後宮號花鳥使帝善之擢左拾遺又獻詩規止校獵渭
川進左補闕帝御製西嶽文詔爲鐫勒使遷起居舍人東巡仗
內每引顏利及蕃奚會長射獵取樂向言鳴梟不鳴未爲瑞
豹虎雖伏弗云仁獸况突厥殘忍莫顧君父陛下震以威武來
以文德勢不得不延若令獲獸從禽狎昵太過臣恐荆卿龍動
何羅竊發雖寸斬就烹何以塞責帝順納久之遷主客郎中向
嘗累探父信不獲一日自朝回道遇一老人物色之乃爰也下
馬抱哭帝聞咨嘆賜以錦綵官朝散大夫卒贈東平太守終喪
再遷中書舍人終工部侍郎贈華陰太守嘗與呂延濟劉良張
銑李周翰更爲文選註解臣救李善繁釀時號五臣注

孫述博州武水人後魏光祿大夫惠蔚之裔曾祖仲將壽張丞

祖希莊韓王府典籤父嘉之第進士以書判拔萃授新津縣簿歷曲周襄邑二縣令終宋州司馬年八十三進幼而英俊文思敏速年十五謁雍州長史崔日用命爲士火填賦揮筆卽成詞理與瞻遂爲忘年之交以是價譽益重開元中應手筆俊拔及文藻宏麗等科授山陰尉遷秘書正字又舉賢良方正玄宗御洛城門引見命郎中蘇晉等第其文具等擬左拾遺張說命于均相往拜之李邕褒其文以示轉左補闕辟李邕太原幕府俄爲起居舍人遷集賢院修撰時海內少事賜羣臣十日一燕宰相蕭嵩賦天成玄澤維南有山陽之華三月英英有蘭和風嘉禾等詩八篇繼雅頌體命述爲序轉考功員外郎取杜鴻漸顏真卿李華薛穎士趙曄等皆海內名士俄遷中書舍人父喪服闋復舊職凡典詔誥八年詞旨精密張九齡謂欲易一字不得

俄充河東黜陟使權判刑部侍郎以病風乞解徙太子左庶子
更少詹事卒贈右僕射諡曰文爲人謙厚不伐人多惜之有集
三十卷 子宿亦爲中書舍人至華州刺史 孫簡字樞中登
元和進士辟鎮國荆南蕲府累遷左司員外吏部郎中諫議大
夫知制誥會昌初由中書舍人遷左丞出更河中興元宣武三
節度使檢校右僕射東都留守弟範亦爲淄青節度使自遜至
簡凡三世在中書掌誥諸子迭貴人推顯家

杜甫字子美預遠裔居襄陽曾祖依藝鞏縣令祖審言字必簡
與從祖易簡俱登進士調闕城尉遷洛陽丞坐事貶吉州司戶
參軍與李嶠崔融蘇味道號文章四友恃才傲世嘗語人曰吾
爲文章當得屈宋作衙官下筆當得王羲之北面爲同僚周季
重郭若訥所構繫獄將殺之子并年十三卽坐上袖刀刺季重

爲左右所殺遂坐免官還東都蘇頌傷并孝烈誌其墓劉允濟
祭以文久之武后召入將用之審言蹈舞謝后令賦歡喜詩嘆
重其文授著作佐郎遷膳部員外坐交張易之流峯州復爲國
子監簿修文館直學士卒年六十餘贈著作郎有文集十卷易
簡九歲能屬文長而博學斌兄岑文本器重之初渭南尉咸亨
初歷殿中侍御史考功員外郎以險躁貶開州司馬卒父閑奉
天鞏縣二令甫七歲能文家貧客吳越齊趙間李邕奇其材先
往顧之應舉不第困長安天寶末上三大禮賦玄宗奇之使待
詔集賢院命宰相試文章擢河西尉不拜改右衛率府胄曹參
軍數上賦頌高自稱道言臣年且四十其所述作雖不足鼓吹
六經至沈鬱頓挫隨時敏給楊雄枚臯可以企及有臣如此陛
下其忍棄之避祿山亂走三川又自鄜州羸服奔行在爲賊所

得挺節無所污至德二年亡走鳳翔上謁拜右拾遺與房琯舊
交上疏稱琯宰相子少自樹立爲醇儒有大臣體觀其深念主
憂義形於色臣歎其功名未就志氣挫切望陛下棄細錄大帝
怒自是不甚省錄出爲華州司功參軍家寓鄜州明年孺弱至
餓死輒棄官去客秦州寓居同谷縣負薪採橡栗自給漸流落
劍南名補京兆功曹不至往依嚴武以世舊相待甚善武爲劍
南東西川參謀檢校工部員外郎於成都浣花溪種竹植樹結
廬松江縱酒嘯咏與田夫野老相狎浪武親過之性頗傲誕或
時不巾帶醉登武林瞪目視曰嚴挺之乃有此兒武外若不爲
忤中衛之一日集吏于門欲殺甫將出冠鈞于簾者三左右白
其母奔救得止武卒遭崔旰亂往來梓夔間大曆中出瞿唐下
江陵泝沅湘因客耒陽游衡嶽祠大水遽至涉旬不得食縣令

具舟迎之始得還一夕醉卒年五十九子宗武元和中流落亦
卒孫嗣業自耒陽遷柩葬于首陽山爲人放曠不樂拘檢好論
天下大事高而不切少與李白齊名號李杜嘗從白及高適過
汴州酒酣登吹臺慷慨懷古人其謝之自唐興時人承陳隋風
流浮靡相矜至宋之間沈佺期等研擗聲音穩順體勢號爲律
詩逮開元間稍裁以雅正然特華者質反好麗者壯遑人得一
節皆自名所長至甫渾涵汪洋千變萬狀兼古今而有之他人
不足甫乃厭餘殘膏賸馥沾丐後人多矣元稹稱其上游風雅
下該沈宋言奪蘇李氣吞曹劉自詩人以來未有如子美者至
數陳時事律切精深雖千言不少衰故世號詩史有文集六十
卷韓愈又曰李杜文章在光燄萬丈長至今尚論以爲傷時挽
弱情不忘君共憐其忠

賀知章字季真德仁族孫神龍中與同郡賀朝萬齊融揚州張
若虛邢巨潤州包融尉氏李澄俱以文詞俊秀名聞京師知章
舉進士初授四門博士賦性夷曠善談論與姑子陸象先善象
先嘗語人曰季真清談風流吾一日不見則鄙吝生矣證聖初
再擢超拔羣類科遷太常博士開元中張說表入麗正書院撰
六典等書轉太常少卿東封草定儀注奏昊天上帝君位陛下
享於山上五方諸帝臣位羣臣視于山下禮成終台于一足以
垂範來葉帝意正合從之還是禮部侍郎兼集賢院學士一時
承兩命咸以爲榮據乾曜語張說二命孰爲美說曰侍郎衣冠
之選要爲具員學士懷先王之道經緯之文然後處之此其爲
間也頃之申王薨詔選挽郎一時取舍不平蔭子喧訴坐徙工
部肅宗爲太子由右庶子遷賓客充侍讀授秘書監玄宗自爲

贊賜之晚節。誕放逍嬉里巷。自號四明狂客。每醉輒屬辭。筆不停書。咸有可觀。善草隸。好事者具筆研從之。意有所愜。不復推拒。紙纔十數字。共傳爲寶。天寶初。得病。夢遊帝居。數日始寤。上章請度爲道士。還鄉里。捨宅爲千秋觀。求瀝湖數頃爲放生池。有詔賜鏡湖剡川一曲。臨行。御製詩贈太子百官餞送。擢其子曾爲會稽郡司馬。侍養幼子。亦聽爲道士。卒年八十六。乾元初。贈禮部尚書。朔萬與融終山陰崑山二令。若盧兗州兵曹巨監。察御史包融集賢院學士。人間往往傳誦其文。獨澄蹉跌不偶。年六十餘爲宋州參軍卒。

李白字太白。興聖皇帝九世孫。其先隋末以罪徙西域。神龍初。遁還客巴西。白生時。母夢長庚星。因以命之。十歲通詩書。稍長。有逸才。志氣宏放。飄然有超世之心。隱於岷山。州舉有道不應。

益州長史蘇頌見而異之曰。是子天才英特。少益以學。可比司馬相如。然喜縱橫術。好擊劍。爲任俠輕財。重施轉客。任城與凡巢父韓準裴政張叔明陶沔居。往徠山日。沈飲號竹溪六逸。天寶初。南入會稽。與吳筠遊。筠被召。從至長安。見賀知章。稱爲謫仙。薦于玄宗。召見金鑾殿。論當世事。奏詞一篇。帝賜食。親爲調羹。命供奉翰林。性嗜酒。日與飲。徒醉于市。帝坐沈香亭。意有所感。欲爲新詞。召入已醉。左右以水頰面。稍解頰之。援筆成十餘章。婉麗精切。文無留思。帝愛其才。數令侍宴。常醉。使高力士脫鞵以爲恥。乃撻其詩。激怒楊貴妃。帝亟欲官之。妃輒沮止。自知不爲所容。益醵放。不自修。與知章李適之汝陽王璿崔宗之蘇晉張旭焦遂爲酒中八仙。懇求還山。帝賜以金。自是浮游四方。晚年更好黃老。度牛渚磯。至姑熟。時與崔宗之乘舟由采石抵

金陵著宮錦袍坐舟中旁若無人其爲詩放浪縱恣擺脫塵俗模寫物象體格豁達常譏杜山醜醜故有飯顆山之訕至市亦以清新俊逸稱之祿山反轉側宿松匡廬間永王璘辟爲府僚璘起兵逃還彭澤及璘敗當誅因嘗救郭子儀犯法至是子儀請解官以贖得長流夜郎赦還潯陽復坐事下獄會朱若愚將兵赴河南道潯陽釋其囚辟爲參謀未幾辭職依當塗令李陽冰悅謝家青山將終焉代宗立召爲左拾遺已卒年六十餘元和末宣歙觀察使范傳正祭其冢禁樵採訪後裔惟二孫女嫁爲民妻進止尚存風範因泣告先祖志在青山野葬東麓非本意傳正爲改葬立二碑焉將以二女改妻士族辭以孤窮失身命也不願傳正嘉嘆復其夫舊役當世盛稱白歌詩裴旻劍舞張旭草書爲三絕旭吳人嗜酒每下筆必大醉呼叫狂走或

以頭濡墨而書呼爲張顛既醒自視以爲神不可復得也初仕
爲常熱尉有老人亦善書識其奇妙陳牒求判旣去復來如是
不輟旭怒其煩責之因令盡出其所家藏視之天下奇筆也自
是益得其法嘗自言始見公主擔夫爭道又聞鼓吹而得筆意
觀公孫大娘舞劍器得其神後人論書歐虞褚陸皆有異論至
旭無敢短者傳其法惟崔邈顏真卿 旻嘗與幽州都督孫佺
北伐爲奚所圍乃舞刀立馬上矢四集皆迎刃而斷奚大驚引
去復善射後擢龍華軍使守北平其地多虎一日射三十虎休
于山下有老父曰此彪也稍北有真虎將軍遇之且敗旻不信
怒罵趨之有頃虎出叢簿中小而猛據地大吼旻馬辟易弓矢
皆墜自是不復射

王維字摩詰宰相縉弟九歲知屬辭長登進士調大樂丞爲濟

州司倉參軍張九齡執政擢右拾遺歷監察御史性孝友母喪
哀毀幾不能生服除累遷給事中爲祿山所得素知其才迫任
故官大宴凝碧池悉召梨園合樂諸工皆泣維聞悲甚賦詩悼
痛賊平徵下獄上憐其有詩名下轉太子中允久之遷中庶子
尚書右丞會綰遠刺川蜀維自表已有五短綰有五長願歸所
任官使名綰還帝許之至上元初疾甚綰復出鎮鳳翔作書與
別及親故朋友停筆而化年六十一贈秘書監生平詩名冠代
復工草隸善畫思入神品至山水平遠雲根石色皆天幾所到
學者不及當時豪英貴人盧左以迎寧薛諸王待若師友尤善
品樂有客以按樂圖示之無題識視曰此霓裳第三疊最初拍
也客未謂然引工按曲果信別墅在輞川地奇勝引輞水周舍
下別漲竹洲花塢有華子岡竹里館茱萸泝辛夷塢與裴迪浮

升往來琴瑟。庸詠集所倡酬。爲輞川集。性好佛。喪妻不娶。錄居三十年。嘗蔬食。飯僧在朝。已然。齊中布經案。退朝後焚香默坐。屏絕塵累。後表輞川第爲寺。葬于其西。寶應中。代宗遣中人王承華往取所撰樂章并詩籍。哀集得四百篇上之。

鄭虔。鄭州滎陽人。其學長於地理。山川險易。方隅物產。兵戎衆寡。無不詳諳。嘗著天寶軍防錄。言典事該諸儒服其善。又善山水。復好書。常苦無紙。慈恩寺貯柿葉數屋。日往取肄。歲久殆遍。天寶初。爲協律郎。坐私撰國史。謫十餘年。玄宗愛其才。以爲廣文館博士。帝特爲虔增置久之。亦廢。乃自寫其詩并畫以獻。帝大署其尾。曰鄭虔三絕。遷著作郎。著書號鄭廣文。又追緝故書得四十餘篇。司業蘇源明名爲會粹。編在官。貧約。潛如也祿山反。僞授水部郎中。因稱疾求攝市令。潛以密章達。蘄武賊平。與

張通王維並囚宣陽里三人皆善世因使給齋壁盡力竭思所
解得免貶台州司戶後數年卒 先有鄭相如者自滄州來師
虔虔未之禮間問所業對曰能知未來虔聳然叩之曰盡三十
年當改盡十五年天下亂賊臣僭位公當汙偽官守節可免虔
又問其自己答曰相如有官三年死衢州是年登第調信安尉
果三年死虔神其言終不附賊

蘇源明武功人寓居徐兗少孤工文辭有名天寶間及第更試
集賢院累遷太子論德出爲東平太守轉入國子司業以不受
祿山僞署振爲考功郎中知制誥數陳政治得失肅宗因史思
明陷洛陽下詔親征上疏極諫陳十不可大略言天時荒歉道
路阻塞侍衛不整將帥偷安文無奇古不錄帝嘉其切直罷幸
官終秘書少監生平雅善杜甫鄭虔其最稱者元結梁肅 肅

字敬之一字寬中隋刑部尚書毗五世孫世居陸渾建中初中
文辭清麗科擢太子校書郎蕭復薦其材授右拾遺修史以母
老不赴杜佑辟淮南掌書記召爲監察御史轉右補闕翰林學
士皇太子諸王侍讀卒年四十一贈禮部郎中

冊曰永徽神龍炳耀鏗鉤如雷兢起四蔭研尋沿及開元
神秀綽約李杜挺生混淪磅礴唐文再變軌物尚却

弘簡錄卷五十二

終

弘簡錄卷五十三

明刑部員外郎仁和弘齋邵經邦學

皇清翰林院侍講學士四世孫遠平校閱

文翰 唐十之三

蕭穎士

子存陸據劉太真李紆傳

李華

宗人翰從子觀

儲光義

王昌齡

常建張子容王冷然崔曙

高適

岑參

元結

曾祖仁基

孟雲卿

沈千運陶峴

徐浩

父嶠

鮑防

薛據

弟橋

劉長卿

嚴維

韋應物

顏況丘丹

盧綸

子簡能簡弘正簡求孫

李端

子虞仲族

錢起

子微孫可復曾

于公異

柳芳

子登冕

蔣父

父將明子沈既濟

子傳師

宇文籍

呂溫

父渭

韋辭

宋廷芬

蕭穎士字茂挺梁鄱陽王恢七世孫祖品賢而有謀任雅相傳
高麗表爲記室嘗詣越王貞陳三策不用度其必敗亡去客死
廣陵父旻莒縣丞穎士四歲能文十歲補太學生親書一覽卽
誦通百家譜系并書稽學開元末登進士第一適父坐事抵罪
往訴府佐張惟一嘉而宥之天寶初補秘書正字聲名播于縉
紳先達裴耀卿席豫張均宋遙皆與均禮奉使括遺書選集賢
校理留客濮陽門人劉太真尹徵柳并閭士和等以次授業號
蕭夫子宰相李林甫欲見之辭方父喪不詣林甫至故人舍邀
之反哭于門內以待林甫不得已往弔乃去怒其不下已服闋
調廣陵參軍中抱素急不能堪作伐櫻桃樹賦以譏林甫會母
喪免嘗病司馬遷史記不足垂訓效春秋編年義類起漢訖隋
凡百篇時王孫辯裔孫緒亦謨永寧公輔梁書黜陳不帝穎士

佐之著梁蕭史譜以隋爲問唐之士德承梁火德作梁不禪陳
論書魏高貴鄉公勛曰司馬昭弑帝於南闕書陳愛梁禪曰陳
霸先反皆出自斷諸儒不與也又自以梁枝孫謂宣帝逆取順
守武帝血食三紀昔曲沃篡晉至文公爲伯仲尼弗貶以發緒
義例史官韋述薦以自代召詣史館待制畏林甫威福自擅不
赴客游吳越後調河南參軍名聞外閭新羅遣使願得蕭夫子
爲師舍人張薦等諫止嘗許太真吾入室斯文不墜寄在是子
徵博聞彊識士和鉤深致遠吾弗逮已并不受命而尚黃老予
亦何誅又陰語并祿山亂將不久卽託疾遊太室山已而果反
往見河南採訪使郭納陳禦守計不用嘆其以兒戲禦剽賊又
往東京觀封常清兵勢不宿而還因藏書箕穎間身走山南節
度使源洧辟掌書記賊別校攻南陽洧懼欲退保江陵穎士說

曰官兵守潼關襄陽乃餉道喉襟一日不守則大事必去且列郡數十人民百萬調兵懷寇社稷功也何遽輕土地取笑天下乎洧乃按甲不出賊果解去又客金陵永王璘召之不赴上書宰相崔圓言淮南副大使李承式玩兵不振楚越重山復江自古中原擾則盜先起宜時遣使以扞鎮江淮俄而劉展果反授以揚州功曹參軍賊方圍雍丘承式遣兵往救宴餞陳女樂諫以天子暴露豈臣下歡樂時矧授兵不測乃使觀聽華麗一旦思歸誰致其死弗聽遂棄去客死汝南逆旅年五十二門人其諡曰文元先生生平樂聞人善以推引後進爲已任所獎目李陽冰李幼卿皇甫冉陸涓等數十人皆爲名士天下推其知人嘗兄事元德秀而友殷寅顏真卿柳芳陸據李華邵軫趙驊所與遊孔至賈至源行恭張有畧族弟李遐劉穎韓恽陳晉孫益

韋建韋收獨華與據名相等夷初游洛龍門讀路旁碑頴士卽
誦華再閱據三遍乃記聞者以定三人才質高下數稱班彪皇
甫謚張華劉琨潘尼能尚古而混流俗不自振曹植陸機所不
能逮當世則裴子野之著書陳子昂富嘉謨盧藏用之文辭董
南事孔述睿之博學而已子存字伯誠亮直有父風能文辭
與韓愈韓會沈既濟梁肅徐岱等善李栖筠表爲常燕王節與
卿聘與陸爲漸等討據古今字原作訛書數百篇建中初累殿
中侍御史比部郎中張滂令主財賦裴延齡疾去之卒後愈自
袁州過廬山故居爲經贈其家軫汝南人據河南人字德勝
後周上庸公騰六世孫寓警邁善物理年三十始到京師公
卿愛其文俊逸交譽之終司勳員外郎太真宣州人善屬文
擢第表淮南陳少游掌書記興元初任河東宣慰賑給使歷起

居郎中書舍人刑部侍郎德宗以天下平宴羣臣曲江御製詩
敕宰相文人賢和自爲品第惟太真及李紱四人爲上鮑防于
邵等四人爲次與選者四十一人轉禮部掌貢士多濫貶信州
刺史卒有集三十卷 紱字仲舒翰族弟禮部侍郎希言之子
少有文字初授校書郎李季卿薦爲左補闕遷司封員外郎知
制誥歷禮兵二部侍郎宣尉河東諸軍出爲虢州刺史遷移同
州終中書舍人贈禮部尚書爲人通達善誅詆引後進奉詔
爲興元紀功述及郊廟樂章爲人所傳 并字伯存大曆中辟
河東掌書記遷殿中侍御史弟談字中甫穎士愛其才以女妻
之 士和字伯均著蘭陵先生誄蕭夫子集論盛推穎士所長
因較歷代文以爲聞蕭氏風者五尺童子遙稱曹陸陽冰善篆
著名幼卿字長夫隴西人大曆中爲右庶子終滁州刺史 冉

字茂政潤州人謚之後十歲能屬文張九齡數與之與弟曾皆
善詩名相上下人以此張景陽孟陽天寶中踵登進士再授無
錫尉王綰表掌書記遷累左金吾兵曹叅軍終右補闕有集三
卷曾字孝常由陽翟令歷監察御史有集一卷

李華字遐叔世出隴西移趙郡曾祖太冲世閥最高太宗時任
祠部郎中族祖知本少涉經術事親篤至爲夏津令與弟伊闕
承知隱雍睦貴用儉僕無間旌爲義門開元中知本孫瑛知隱
孫頤皆有文詞俱拜給事中至揚州刺史太僕少卿華少曠達
外若坦蕩內存謹重尚然許每慕汲黯爲人登進士宏辭二科
天寶中遷監察御史轉侍御史時楊國忠多任支姪爲州縣所
在猶得華因出使劾按不提部內肅然俄爲所嫉徙右補闕擢
吏禮二部員外郎車駕幸蜀以母在鄴間行求之爲盜所得僞

署鳳閣舍人賊平徙杭州司戶自傷節損親亡絕意仕進上元
中累召皆稱疾不赴客隱山陽力農自給安心窮稿晚好佛法
不甚著書惟應人壽版傳記及州縣碑頌時獲金帛素與顏
齊名世號蕭李而文辭條麗少雄傑氣顏士詞鋒健爽時謂不
及自許輒過之擬作含元殿賦弔古戰場文極意研確他日顏
士讀之問誰可及答曰君加精思便能至矣華愕然信服生平
愛獎士類名隨以重若獨孤及韓雲卿柳識崔祐甫謝良弼朱
巨川多至顯官所撰元德秀權皋銘四皓贊人稱三絕大曆初
卒有文集十卷 宗人翰亦有名擢進士調衛縣丞遷侍御史
房琯韋陟薦爲史官累遷左補闕翰林學士以病免卒時多媚
張巡功以爲降賊肅宗未及知翰爲傳一符同表上曰臣聞聖
主褒死難之士養死士之孤或親推轎車或追建封邑厚死以

慰生撫存以答云。君不遺於其臣。則臣亦不背於其君也。自逆賊據雒陽。引幽朔以吞河南。巡無一伍之士。一節之權。獨奮忠誼。率烏合守雍丘。潰賊心腹。時欲繞出巡後。以擾江淮。畏巡退軍。睢陽扼東南咽喉。自春訖冬。大戰數十。小戰數百。以弱制強。出奇無窮。斬馘兇醜。凡十餘萬。賊不敢越睢陽。取江淮避之力也。城陷見執。卒無撓詞。慢叱兇徒。精貫白日。雖古忠烈。無以加焉。議者罪巡以食人。愚巡以守死。臣竊痛之。設若無巡。則無睢陽。無睢陽。則無江淮。有如賊因江淮之資。根結盤據。雖終殲滅。其曠日持久必矣。今陝郢一戰。逆賊駭北。王師震其西。巡扼其東。此天使巡以待陛下。不可謂功乎。巡子亞夫。雖得官。不免饑寒。陛下宜割百戶俾食其子。又宜於睢陽相擇。高原起大冢。招魂而葬。帝大感悟。其爲文精密而思遲。故常從皇甫謐求音樂。

思淵則秦之神逸乃屬文從于觀字元賓有高才行出古人
貞元中登進士宏辭二科授校書郎其屬文不旁公前人初與
韓愈相上下年二十九早卒愈文乃益工陸希聲常謂觀尚辭
故辭勝理愈尚質故理勝辭愈雖窮老終不能加觀之辭觀後
愈死亦不能逮愈之質

儲光義兗州人開元十四年進士天寶中詔中書試文章爲監
察御史其詩格高調逸削盡常言趣遠清深挾風雅之道得浩
然之氣所著政論十五卷九經分義疏二十卷官博理當可謂
經國之才祿山反陷賊自歸卒有集七十卷

王昌齡字少伯江寧人工詩緒密思深時稱王江寧第進士補
秘書郎連中宏辭遷汜水尉操始孤潔恬澹與物無忤晚節不
護細行謗議沸騰貶龍標尉以世亂還鄉才名不減爲刺史閭

丘曉所殺有集五卷

時與汝州人劉希夷江東人劉希虛洛

陽人祖詠宋州人崔曙盱眙尉常建樂城尉張子容進士王泠然皆一時茂秀聲名曄然後咸流落不偶希夷一名庭芝好爲宮體小詩詞旨悲苦如去年花落顏色改今年花開復誰在大爲人所稱賞脊虛情幽興遠思苦調奇忽有所得便驚衆聽雖氣骨不逮自永明以來可謂傑立詠詩剪刻明淨用思尤苦氣雖不高調頗凌俗曙詩言辭欸要情興悲涼送別登樓俱堪下淚建詩似初發通莊却尋野徑百里之外方歸大道所以其旨遠其典僻佳句輒來惟論意表雖潘岳到今能叙悲怨未有如之者子容宦逐窮邊與泠然官微思怯又汴州人崔顥少年爲詩屬意浮艷多陷輕薄登進士有文無行好蒲博嗜酒娶妻惟擇美者有不愜卽棄之晚歲忽變常體風骨凜然商璠以爲

鮑照江淹須有慙色終司勳員外郎

高適字達夫滄州蓨人父從文位終韶州長史適少落魄不治生事客梁宋間刺史張九臯奇之舉有道中第調封丘尉哥舒翰表爲掌書記拜左拾遺轉監察御史討祿山時佐守潼關翰敗問道追帝及於河池遷侍御史俄轉諫議大夫負氣敢言權近側目嘗語帝不可令諸王分鎮永王果叛肅宗召與計事度王必敗不足慮帝奇之除淮南節度使令率師與江東韋陟淮西來瑒共會安陸方濟江報王已敗李輔國忌其才數毀之下除太子少詹事未幾蜀亂出爲蜀彭二州刺史斬梓將段子璋命代崔光遠爲西川節度使廣德元年吐蕃取隴右適出南鄙欲牽制其力久而無功遂乞松維二州及雲山城召還猶爲刑部侍郎左散騎常侍封渤海縣侯卒贈禮部尚書諡曰忠

爲人尚節義語霸王畧衮衮不厭遭時多難以功名自許而言
浮其實不爲搢紳所推然所治政寬簡人咸便之年五十始留
意爲詩數年之間體格漸變以氣貫自高每吟一篇輒爲好事
者稱布以爲有唐以來詩人之達者惟適而已常貽賀蘭進明
詩使救梁宋以親諸軍及與許叔冀書令釋憾未度淮又移檄
將校仰絕永王各自暴白君子許其義而知變

岑參宰相文本後裔登天寶進士歷安西關西節度判官試大
理評事攝監察御史杜甫薦其識度清遠議論雅正佳名早立
時輩所仰擢左補闕歷起居郎至侍御史出爲嘉州刺史杜鴻
漸重之屬中原多故卒死于蜀其詩語奇體變意亦新遠有集
八卷

元結字次山河南人後魏常山王遵十五代孫世襲常山郡公

曾祖仁其字惟固從征遼東以功賜宜君田二十頃拜寧塞令
自來皆承王公餘烈惟鷹犬聲榮是習至祖亨字利貞始以儒
學變易霍王元軌聞其名辟參軍事父延祖三歲而孤逝長不
仕年過四十始調春陵縣丞輒棄官去灌畦掇薪以自娛樂卒
年七十六門人私謚曰太和先生結少不羈年十七始折節向
學事從兄德秀天寶中舉進士禮部侍郎陽浚嘉其文擢上第
復舉制科遭亂後蘓源明薦於肅宗召問上時議三篇其一曰
往年逆賊東窮海南淮漢西抵兩秦北徹幽都醜徒狼戾動幾
百萬其禍烈矣曾不踰時摧銳攘凶復兩京收河南何其易耶
乃今山東河北姦逆不盡江湖林藪亡命尚多破州殘縣百姓
轉徙將士奔突賢人遁逃陛下往在靈武鳳翔豈如今日勝兵
而能殺敵豈如今日檢禁而無亡命豈如今日爵賞而將士不

離豈如今日朝廷而賢者樂仕何哉蓋由前者天子愧恨陵廟
燬傷上皇奔播宗戚誅殘側身勤勞親撫士卒與人權位信而
不疑渴聞忠直弗諱改過此能以弱制強以危取安今天子深
宮燕安端冕臨朝大官具味太常備樂軍機國務參籌乃進百
姓疾苦時有不聞輒芻良馬宮籍美女與服禮物休符瑞謀益
以諧臣歌頌盛德聽而不厭貢賦爭上怡愉天顏大臣小官權
賞踰羣此所以不能制強拯危若陛下視今日能如靈武時何
寇盜彊弱可言哉其二吾聞天下士人昔奉天子拒凶逆勝則
國家兩全不勝則兩亡故生死決于戰是非極於諫今吾位重
財足爵賞已厚勤勞已極外無仇讎害我內無窮賤迫我何苦
當鋒刃以近死忤人主以近禍乎又聞州里病父老母孤兄寡
婦受賦與役者流亡死徙乞食凍餒悲憂道路天下安我等豈

無咎。自處若不安窮盡。且死。今朝廷亡公。直天下失忠信。蒼生益冤。吾等儼於野。又何所及哉。其三。凡有詔令事皆不行。空言一再。頗類諧戲。雖有仁卹之令。憂勤之語。人皆族立黨語。指而議之。陛下不知其然。以爲言雖不行。猶足以勸臣竊以爲沮。勸在乎明審均當而必行也。誠能堅已言之信。必將來之法。頻令拘忌。一切蠲蕩。任天下賢士。屏斥小人。威令謹行不惑。此帝王常道。何爲不及。帝悅曰。卿能破朕憂懼。右金吾兵曹參軍攝監察御史出爲山南西道節度參謀。募唐郾汝蔡義士降劇賊五千。瘞戰死露齒於泌南。名曰哀丘。帝將親征。史思明結言賊。銳不可與爭。宜折以謀。帝善之。因命發宛葉兵結屯泌陽守險。全十五城以功。遷御史裏行。進水部員外郎。佐荆南呂諲。轉來瑒府軍中有父母妻子隨者。咸衣食之。瑒誅令攝府事。代宗立。

固辭侍親歸樊上授著作郎益著書作自釋述已始稱元子少
居商餘山著元子十篇兵興逃入猗玗洞稱猗玗子後家漢濱
復稱浪士及有官人皆謂浪者漫爲官故呼漫郎旣客樊上左
右皆漁者少長相戲更曰整叟又謂公之漫其猶聾乎於戲吾
不從聽於時俗不鈎加於當世誰是聾者當以漫叟爲稱直荒
浪其情性誕漫其所爲使人知無所存有所將待乃爲語曰
能帶冬簪全獨而保生能學整叟保宗而全家聾也如此漫乎
非邪久之拜道州刺史在職爲民營舍給田免徭流亡歸者萬
餘各請免所負租稅及上供和市雜物許之諸使調發輒言人
困不忍加賦進容管經畧使身諭蠻豪綏定八州會母喪人皆
請留加左金吾衛將軍民樂其教至立石頌德罷還京師卒年
五十贈禮部侍郎

孟雲卿平昌人與元結同鄉里以辭學相友登進士授校書郎
生平好古其詩祖述沈千運又漁獵陳子昂詞氣傷古怨者之
流當今古調無能出其右者高仲武爲著格律門論及譜二篇
以攝其體貌與彭澤孫陶岷布衣焦遂進士孟彥琛邀遊江湖
峴家崑山豐田疇自置三舟一自載二賓客三飲僕妾女樂
咸備吳越之士號爲水仙千運吳興人挺於流俗自風雅不作
近代更相沿襲拘限聲病喜尚形似乃強攘於已陷之後窮老
不減五十餘年凡所爲文皆與時異且正直忠信久困窮賤不
干祿位沒後結裏其遺作二十餘首入篋中集彥琛字士源天
寶末爲武昌令嘗黜官無情千運與結同遊退谷泛杯湖作詩
美之

徐浩字季海越州人父嶠之官至洛州刺史善書草隸尤工世

狀其法曰忽覓抉石渴驥奔泉浩自少文雅著名舉明經工于
草隸得父傳傳授以八體書凡四十二篇由是益工復善文辭
張說見其喜兩賦并五色鶴賦咨嘆以爲後來之英由魯山簿
薦爲麗正殿校理三遷右拾遺辟幽州張守珪幕府改監察御
史內外服除歷京兆河南司錄河陽令以善政稱民有妄作符
命者衆不諳文理咸不爲疑浩獨按篆詰狀果詐爲之留守王
倕表署其府累遷太子司議郎金部員外憲部郎中祿山反出
爲襄陽太守兼防禦使賜金紫肅宗召拜中書舍人詔令多出
其手時方事殷遣詞贈速書楷至精上悅其能加兼尚書右丞
叅預兩朝文翰傳位策寶龍章鳳誥冠絕一時寵遇罕比建言
故事有司斷獄必經刑部詳覆自先朝奸相專擅威福許有司
就丞相府斷事尚書以下未省卽署有爭愼恤之意請如故便

詔可刑部詳斷復自此始無何除國子祭酒爲李輔國譴貶瀋
州長史代宗立復中書舍人兼集賢殿學士尋遷工部侍郎封
會稽縣公出爲嶺南節度觀察使兼御史大夫晚節黷貨聲譽
稍減入拜吏部侍郎與薛邕分典選嬖倖莫陳氏自授其弟
京尉爲李栖筠所劾貶邕欽州刺史浩明州別駕德宗初起授
彭王傅卒年八十贈太子少師諡曰定

鮑防字子慎襄陽人少孤妻彊志于學善辭章登第辟浙東觀
察薛兼訓從事累殿中侍御史入爲職方員外郎除太原少尹
節度行軍司馬代宗召見慰遣之俄知留後爲太原尹領節度
使人樂其治詔圖形別殿入爲御史大夫歷福建江西二觀察
使召拜左散騎常侍從德宗狩奉天進禮部侍郎封東海郡公
其於詩尤工多所感發以譏切時弊名與中書舍人謝良弼相

埶時稱龜謝貞元初典制舉得穆質裝復柳公綽歸登崔邠事
純魏弘簡熊執易諸名士時比歲舉策問陰陽祲沴質引漢故
事免三公卜式請烹弘羊指切輔政右司郎中獨孤而欲下質
防不許曰使上聞所未聞不亦善乎卒置高第帝見策嘉揖擢
防京兆尹歷任中外咸有政聲坐過宰相竇參於道不引避迫
令致仕授工部尚書依恨而卒年六十九衆多憫防而咎參不
旋踵參乃及禍贈太子少保諡曰宣

薛據河中寶鼎人曾祖文思官中書舍人父元暉什邡令生三
子據摠播伯元暉臨縣丞妻濟南林氏生四子彥甫彥國彥偉
彥雲林氏丹陽太守洋之妹有母儀令德博涉五經善屬文所
爲篇章人多諷詠會父伯早卒子姪皆孤幼林氏悉訓導之以
至成立咸致文學之名歷開元天寶二十年間七人並登進士

衣冠榮之。據爲人骨鯁。兼有氣魄。其文亦不自傷。不卑。不達。當世推爲曠代佳作。播初補校書郎。累授萬年縣丞。武功萬年令。殿中侍御史。刑部員外郎。性溫敏。善與人交。李栖筠常袞崔祐甫皆引擢之。拜中書舍人。出任汝州刺史。以公事貶泉州復轉晉州刺史。河南尹。遷尚書左丞。終禮部侍郎。贈尚書子公建亦中進士。累佐鳳翔河陽軍府。以國子祭酒居東都卒。

劉長卿字文房。河間人。登開元進士。與嚴維秦系皆有詩名。常相贈答。權德輿每言長卿自以爲五言長城。二人用偏師攻之。雖老益壯。至德中爲監察御史。檢校祠部員外郎。歷轉運判官。知淮西鄂岳轉運。留後鄂岳觀察使吳仲儒誣奏貶潘州南巴尉。會有爲辨之者。除睦州司馬。終隨州刺史。卒有集十卷。高仲武論其雖不新奇。甚能鍊飾。足以發揮風雅。維字文正。越州

人至德二年進士授校書郎歷諸暨及河南尉終嚴中丞幕府
有詩一卷

韋應物曾祖待價祖令儀父鑾應物爲人性高潔鮮食寡欲所
居焚香掃地而坐其爲詩馳驟建安已還得其風韻與長卿顧
況丘丹僧皎然往來酬唱天寶中任三衛扈從遊幸永泰中歷
洛陽丞京府功曹參軍大曆十四年除鄆縣櫟陽二令建中二
年陞比部員外郎出刺滁與江州赴闕進左司郎中貞元初改
蘄州刺史有詩十卷世稱韋蘄州 况字道翁姑蘄人至德進
士性詆諧志向疎遠與柳渾李泌爲方外友德宗時召爲秘書
郎久之遷著作郎坐詩語調謔貶饒州司戶居於茅山以壽終
其詩偏於逸歌長句駿發踔厲往往若穿天心出月脇意外驚
人非尋常所及丹陽平人官至員外郎 皎然姓謝字清晝湖

州人靈運十世孫嘗預刺史顏真卿論撰韻海貞元中取其集藏之集賢御書院刺史于頔爲序皎然後居杼山著杼山詩式與集十卷並傳

盧綸字允言山范陽徙家蒲州遇亂奉父翰避地鄆陽與郡人吉中孚林泉相友大曆初還京受知元載取其文以進補閭鄉尉遷監察御史王綰兄弟聞其詩名禮待逾厚奏爲秘書郎兼集賢學士坐累復起歷陝府戶曹密縣昭應二令米泚亂渾瑊收爲元帥判官貞元中中孚爲戶部侍郎薦權戶部郎中舅韋渠牟復薦德宗召入內殿令和御製詩方欲委之掌誥無何病卒在大曆中與中孚及盧部郎中司空曙駕部郎中韓翃都官員外郎苗發侍御史夏侯審補闕崔峒拾遺耿諱并李端錢起皆以辭情敏麗號十才子曙字文初廣平人翃字君平南陽人

發晉卿子峒博陵人漳河東人至貞元末六人先喪傷悼之際
追感前事賦詩五十韻其畧云侍郎文章宗傑出淮楚靈掌賦
若吹簫司言如建瓴郎中善慶餘雅韻與琴清鬱鬱松帶雪蕭
蕭鴻入冥員外真貴儒弱冠被華纓月香飄桂實乳酒凝瓊英
補闕思冲融巾拂藝亦精彩蝶戲芳圃瑞雲滋華屏拾遺典難
作逸調曠無程九醞片爾滋三花寒轉馨校書才智雄舉世一
妙粹睹聖鬼神變屬辭驚鳳鸞差肩曳長裾總轡奉和鈴共賦
瑤臺雪同觀金谷坐倚天方止劍沉水忽如餅君持玉盤珠寫
我懷袖盈韻罷涕交頤願言臍百齡其才思皆此類也後文宗
好文嘗問侍臣盧綸集養卷有子弟否李德裕曰綸四男簡能
簡辭弘正簡求皆有文名登進士上卽遣使詣其家令進文稿
獻所集五百篇優詔嘉之簡能字子拙兄弟皆辟藩府歷監

察御史殿中侍御史駕部員外司封郎中充鳳翔節度判官鄭
注亂爲監軍所害簡辭字子策初表太原李程節度判官長
慶末爲侍御史旣富文雅尤精法律臺閣舊事靡不經懷故京
尹黎幹坐魚朝恩黨誅田產籍沒寶曆中幹男炯詣臺請復故
業臺司莫知本末簡辭語以大厯已來赦令皆無原洗之詞炯
安得冒論移文汝州仍給百姓又按福建監鐵院官盧昂家得
金牀瑟瑟枕大如斗獻于敬宗曰此官中所無遂坐昂罪歷考
功員外郎中太和中爲太僕卿坐事出爲衢州刺史會昌中歷
刑戶兵三部侍郎大和中初檢校工刑二部尚書兼御史大夫忠
武山南東道兩軍節度使卒以正字子強始辟劉悟掌書記
沈傳師表江西團練副使太和中按華州刺史宇文勣賊文宗
怒將殺鼎弘正執奏首罪由戶部侍郎盧允中鼎以監司連坐

不應死方得減等俄遷兵部郎中給事中劉祺誅令銜命宣諭
三鎮使還拜工部侍郎大初中轉戶部充鹽鐵轉運使鹽法積
弊課入不支奏判官司空與爲安邑解縣兩池使益務檢察特
立新法三年課入加倍其法至今賴之踰年檢校戶部尚書出
爲武寧軍節度徐泗濠觀察等使在鎮四年承智典驕慢後誅
鋤首惡喻以忠義訖於交代軍旅無譁又轉兵部移鎮宣武宋
毫卒贈右僕射簡求字子臧初辟江西王仲舒從事又爲元
稹浙東江夏兩鎮掌書記歷僧儒裴度襄陽太原洛都三任賓
佐賜緋魚還水戶二部員外郎達於機略會討劉稹拜忠武節
度副使兼本道供軍使入爲吏部郎中出更蘓壽二州刺史大
中元年党項叛擢四鎮北庭涇原渭武節度押蕃落等使檢校
左散騎常侍上柱國封范陽縣男食邑三百戶又以雜鹵寇邊

歷檢校工刑二部尚書兼御史大夫義武隴西二軍節度觀察等使十四年代裴休爲太原尹北都留守生平辭翰縱橫長於應變所歷四鎮皆控邊陲撫御晏然太原素管退渾契苾沙陀三部多爲邊患開懷撫接示以恩信一切貢賦咸罷部人欣然聽命咸通初辭疾授太子太師致仕還東都累年治園林別墅歲時行樂與子弟公卿詩酒賞詠竟日忘歸卒年七十六贈左僕射諸子咸繼登進士簡能子知猷釋褐秘書正字辟蕭郡江陵成都兩府記室入爲左拾遺右補闕史館修撰轉兵吏二部員外郎中賜緋魚改太常少卿出爲饒商二州刺史徵拜給事中轉中書舍人僖宗幸山南避地金州駕還徵拜工部侍郎判史館遷尚書右丞歷兵部侍郎工部尚書從昭宗在華加檢校右僕射太子少師兼太師檢校司空卒爲人器度渾厚

文辭美麗尤善楷法落筆措翰人爭模倣子文慶位至丞郎弘正子虔湛有俊才所著文筆爲時所稱終秘書監簡求十子以貽殷立禧出繼簡辭終光祿少卿并國子博士餘知名者嗣業汝弼嗣業累辟使府廣明初歷長安尉直昭文館拾遺補闕辟王鐸都統判官終檢校禮部郎中汝弼累遷至祠部員外郎知制誥從昭宗遷洛懼柳璨誣陷退居上黨從節度使丁會歸太原李克川奏爲節度副使累遷戶部侍郎見父太原公署龍泉亭手筆尚存每燕集感懷未嘗敢居賓位素工楷書多知唐故典佐莊宗受命封拜官爵皆出其手卒贈兵部尚書盧氏兩世貴盛六卿方鎮相繼而未有居輔相者至後周嗣業子文紀仕至中書侍郎平章事

李端趙郡人大理丞震子登進士授校書郎工爲詩郭曖尚昇

平公主賢明有才思喜詩人端等多在門下。安集賦詩主坐
 簾中視詩美者贈百緡。端先獻警句云：薰香荀令偏憐小，傅粉
 何郎不解愁。主卽贈以緡錢，起不伏，疑爲宿構，請以起姓爲韻。
 端卽褰裳吟曰：方塘半畝草芊芊，初月如鉤未上絃。新開金埒
 教調馬，舊賜銅山許鑄錢。屢以爲愈，工起等始服。後移疾江南，
 終杭州司馬。子虞仲字見之，亦工詩。登進士宏辭兩科，授弘
 文校書，從事荆南，入爲太常博士，建言諡者所以表德懲惡，春
 秋褒貶法也。茅土爵祿，侈辱流於皆緣，一時非以明示百代所
 賴，後世可以知前。惟諡是觀，古者將葬，請諡。今近武三年，遽乃
 數十年人歿已久，風績湮歇，採諸傳聞，不可考信。諫狀雖在，言
 與事浮。臣請凡得諡者，前葬一月，考功敕太常定議，其不請與
 請而過時者，聽御史劾舉。居京師不得過半，據居外一莽若善。

惡著而不請許考功察行諡之節行卓異雖無官及官卑者所
在以聞詔可遷兵部員外司勳郎中寶曆中考制策甚精轉兵
部郎中知制誥拜中書舍人太和四年出爲華州刺史兼御史
大夫拜左散騎常侍兼秘書監轉尚書右丞歷兵吏二部侍郎
卒年六十五贈吏部尚書爲人簡淡寡欲立性方雅奕代文學
達而不矜士友重之族人家嘉祐字從一登天寶進士調江陰
令上元中爲台州刺史大曆中改袁州與嚴維劉長卿冷朝陽
善高仲武稱其振藻天朝大收芳譽爲中興高流其視錢郎各
爲一體往往涉於齊梁綺麗蓋吳筠何遜之敵也四年謫官滯
江城召爲中臺郎有詩一卷號晏閣集

錢起字仲文吳郡人善五言詩初從鄉薦客居江湖常因月夜
獨步聞庭中有人吟曰曲終人不見江上數峯青起愕然攝衣

視之無所見以爲鬼怪而志之天寶十年就試試官李暉以湘
靈鼓瑟爲題韻限青字起卽以鬼謡爲落句晔深嘉之稱爲絕
唱登第授秘書郎與郎士元齊名時稱前有沈宋後有錢郎一
時盧綸輩十人唱酬出入貴遊之門才名大播形於圖畫後終
考功郎中有集十一卷子微字蔚章登進士喪署觀察使樊
澤掌書記又辟宣歙樞密府元和初入爲左補闕遷祠部員外
司封郎中充翰林學士知制誥九年拜中書舍人學士承旨以
諫止淮西用兵忤旨徙太子右庶子獨不受韓公武賂遺或言
時非當路可無讓辭曰取之在義不在官出拜虢州刺史長慶
元年進禮部侍郎知貢舉坐段文昌李紳私屬不諧遭構貶江
州刺史按釋誣劾貢船濱江惡少果得真盜於舒州復蠲牛租
錢百萬以給宴飲贈餉令代貧民租稅轉湖州穆宗下詔原雪

釋前誣擢遷工部侍郎乃兩任華州文宗立召拜尚書左丞前
老不許驟轉吏部尚書致仕卒年七十五贈右僕射爲人素恭
謹有公望與薛正倫魏弘簡善皆前死撫其孤至婚嫁成立
孫可復可及皆登進士可復官禮部郎中死鄭注時可及終太
子賓客 曾孫珣字瑞文善文辭宰相王搏薦知制誥進中書
舍人搏得罪貶撫州司馬 士元字君胄中山人進士試補汴
南尉歷右拾遺終昂州刺史有集一卷

于公異吳人登進士文章精拔爲時所稱左丞盧邁薦之李晟
表掌書記至祠部員外郎朱泚平令作露布以上德宗覽其詞
至臣已肅清宮禁祇奉寢園鍾簾不移廟貌如故泣下不自勝
左右爲之哽咽因問誰爲之以公異對稱善久之以初應舉與
陸贄同時不協及是言公異不能事後母旣仕不歸省詔賜孝

經罷歸田里竟以不振而卒

柳芳字仲敷蒲州人少嗜學開元末登第由永寧尉直史館爲
意論著時刻不忘肅宗詔綴輯吳兢所次國史起高祖迄乾元
凡百三十卷叙天寶後事時承寇亂見聞外謬上元中坐事徙
黔中遇高力士貶因質問禁中事具識本末推行義類倣編年
法爲唐曆四十卷頗有異聞然不立褒貶義例爲諸儒譏訕後
歷右拾遺補闕史館修撰遷左金吾衛騎曹參軍改右司郎中
集賢殿學士卒 子登字成伯沱貫羣書以該洽著稱年六十
餘始仕累遷至膳部郎中元和初爲大理少卿同蔣乂刊正敕
格歷右庶子秘書監右散騎常侍致仕卒年九十餘贈工部尚
書 孫璟字德輝寶曆初登進士宏詞二科三遷監察御史因
監郊廟祭告據開元元和詔書惟尚書僕射宰相得攝太尉司

空司徒其雜品餘司皆不得攝請如舊制從之累遷度支吏部
員外郎知制誥開成初爲翰林學士先是永泰中祖芳按宗正
謀斷自武德以來昭穆系承撰新譜二十卷帝命復撰永泰後
事按成十卷遷中書舍人武宗立轉禮部侍郎會昌二年再主
貢部爲人寬信好接寒士稱人之長游其門者皆顯於世坐子
招賄貶信州司馬終彬州刺史 冕字敬叔博學富文辭有名
著述與父芳並居集賢院歷右補闕史館修撰坐善劉晏貶巴
州司戶還爲吏部郎中攝太常博士昭德王皇后崩用冕議皇
太子卒哭除服德宗重慎祠事動稽典禮疑郊廟每升輟去劍
履因問象劍尺寸祝語輕重皆據禮經沿革本末以對上甚嘉
之執政忌其論議勁切出爲婺州刺史十三年擢兼御史中丞
福建觀察使素性躁狷自以久疏在外上表乞代臣忝收固之

寄憤不朝之臣思一入覲率先天下使君臣之義親而不疏朝覲之禮廢而復舉誠恐負薪澁先朝露臣之憂也表累上其辭哀切詔許之未幾坐事代還卒贈工部尚書

蔣又字德源由常州義興徙河南代爲名儒祖璵開元中弘文館學士至太子洗馬父將明天寶末爲河中節度副使遇亂以計全奔潞等州後被拘執陽狂遁免從號王巨討賊歷侍御史擢左司郎中國子司業終集賢殿學士又性銳敏七歲能誦哀江南賦從外祖吳兢家學得其傳博覽彊記該綜羣籍弱冠父引入集賢院整比圖書宰相張鎰楊綰奇之署集賢小職當亂後部分得二萬卷遷王屋尉充太常禮院修撰貞元九年擢右拾遺史館修撰以諫張孝忠子茂宗方居母喪尚主垂繆典禮違忤人情不可爲法帝雖不從嘉其守正久之遷起居舍人司

勳員外郎皆兼史任凡二十餘年帝嘗登凌烟閣視左壁觀赫
題文漫缺無能知者召父詳問答曰此聖曆中侍臣圖贊卽於
帝前口誦不失一字帝歎與虞世南然爲列女傳正同卽命補
之又問神策軍建置本末衆學士不能對又條據詳悉宰相高
郢鄭珣瑜相顧嘆服加兼判集賢院事父子並任儒者榮之當
順宗祔廟議祧中宗咸謂常中興不當遷又分別言凡非我失
之自我復之則爲中興若漢光武晉元帝是也自我失之因人
復之名曰反正不得爲中興若晉孝惠孝安是也今中宗與惠
安二帝同不可爲不遷主議者又疑若遷中宗則五王配饗永
絕又曰凡禘祫功臣合食今廟雖毀然禘祫並陳太廟配食與
初一例無改由是遂定元和二年遷兵部郎中與許孟容等刪
正開元以來制敕爲三十卷以上儀誅李錡罪止坐錡及子息

無旁及者語見錡傳以修德宗實錄勞封義興縣公官至右諫
議大夫太常少卿秘書監卒年七十五贈禮部尚書諡曰懿爲
人性資朴直不附比權貴嘗疏裴延齡罪惡拒王叔文要請當
世高之結髮志學老而不厭雖甚寒暑卷嘗不釋故能兼通百
家尤明前世沿革朝廷每有大議宰相未能決必咨訪之成棟
經義參以舊章允切該詳初以是被遇終忤貴近不至顯官藏
書萬五千卷有所撰宰輔錄并凌烟功臣祭府學士史臣等傳
共百餘卷初名武欲諷憲宗偃武修文請改名又帝又自更侍
御史唐武名曰慶祿臣始知帝且厭兵矣五子係乃韓愈之
孫善屬文得父典實太和初授昭應尉直史館明年拜右拾遺
史館修撰憲宗實錄完轉右補闕嘗泣諫宋申錫被誣文宗爲
之霽威時論稱許歷膳部員外工禮兵三部郎中開成末轉諫

議大夫李德裕惡李洙波及姁姻出爲桂管觀察使人安其治
復貶唐州刺史宣宗立召爲給事中集賢殿學士歷右丞吏部
侍郎刑部尚書興元鳳翔二鎮節度使懿宗初檢校右僕射移
鎮山南東道封淮陽郡公徙東都留守卒 孫曙字耀之咸通
末由進士署岳鄂團練判官除虞工二部員外改起居郎避黃
巢難爲道士以終 偕以父任歷右拾遺史館修撰轉補闕主
客郎中宣宗命集柳芳唐曆自大曆盡元和分年撰次成之累
遷太常少卿又撰次文宗實錄凡三世踵史職故蔣氏日曆傳
之天下仙信皆至刺史仲爲宰相

沈既濟吳人經學該明博通羣籍尤工史筆楊炎善之薦其有
良史才召拜左拾遺史館修撰常非吳兢所撰則天本紀當正
稱太后不宜曰上中宗嗣位在太后前叙記不宜反在後下宜

直稱皇帝不宜曰盛。盛。王。唐宗在景龍前宜曰相王。未容曰帝。且則天擅革唐命。後有遺制。自去帝號。強列帝紀。是謂亂名。祔陵配廟。皆用后禮。而孝和上諡開元冊命。不易后名。是謂忘實。昔漢高后稱制。獨有王諸呂爲負約。無遷鼎革命事。矧其時孝惠已殤。子非劉氏。故不得已而紀呂后。議者猶謂不可。今中宗以始年卽位。季年復祔。雖尊名中尊。而天命未改。春秋歲書魯昭公出曰公在乾侯。示君雖失位。不敢廢也。請省天后合中宗記爲一。每歲首必書在所以統之。曰太后行某事。改某制。庶名不失正。禮不違常。當時議不行。作史者至今稱之。德宗立銳于求治。詔中書門下分置待詔官三十員。用度皆樞公錢收子以贍。旣濟諫今日之治。患在官煩。不患員少。患在不問。不患無人。兩省官自常侍諫議補闕拾遺四十員。日止兩人待對。缺員尚

多未補若先補其缺何事官外更置且置錢取息有司權制非
經常之法今置員三十月費不減百萬以息準本須三千萬所
損尤甚今開輔大病皆爲百司息錢毀室破產積患未有以革
可復困之其事遂寢炎得罪坐貶處州司戶終禮部員外郎所
撰建中實錄時稱其能 子傳師字子言材行有餘治春秋工
楷法貞元末登進士制策二科權德輿杜佑許孟客皆器重之
授校書郎調鄧縣尉直史館轉右拾遺左補闕史館修撰遷司
門員外司勳郎中知制誥拜翰林學士改中書舍人辭疾出爲
湖南觀察使許卽官中修憲廟實錄寶曆二年入拜尚書右丞
復歷江西宣歙觀察明於吏治下不敢欺尤重刑法遇有大獄
必務平處輕重盡情嘗誡郎吏尹倫寧可闕事不可多事故所
蒞以廉靖聞入爲吏部侍郎卒年五十九贈尚書生平性恬退

不競仕進化刑于家閨門雍肅兄弟子姓無間親疎衣食如一并餉姻故帑無宿儲更三鎮十年無書賄及權家僚佐如李景讓蕭實杜牧極當時之選宰相以姻私皆固拒之既沒鬻宅以葬 孫詢字誠之家傳能文會昌初登第補渭南尉累遷中書舍人翰林學士出爲浙東觀察使除戶部侍郎判度支咸通四年爲昭儀節度使治尚簡易人皆便安坐奴私侍兒結牙將爲亂舉家遇害贈兵部尚書

宇文籍字夏龜父涇籍少好學長於春秋右拾遺竇爽以自代由是知名登進士辟武元衡西蜀從事遷咸陽尉直史館與韓愈同修順宗實錄遷監察御史以捕王承宗弟承系客悞貶江陵戶曹叅軍節度使孫簡知而重之入爲侍御史轉著作郎遷駕部員外史館修撰穆文朝以憲順實錄繁簡不當刪於取

拾詔史臣添改復與韋處厚韋表微路隨沈傳師同修俄知制誥轉庫部郎中太和中遷諫議大夫卒年五十九贈工部侍郎爲人性簡澹寡合耽玩經史精於著述而風望峻整爲時輩推重子臨大初中初登進士第

呂溫字化光河中人祖延之越州刺史浙東觀察使父渭并弟恭儉讓皆登進士有美才然皆好奇近利渭初調永康令授大理評事辟浙西李涵觀察支使入爲司門員外駕部郎中知制誥歷中書舍人禮部侍郎當試進士時中書省有柳樹建中末枯死與元初駕還其樹再榮人謂瑞柳卽取爲賦題上嘉之素附裴延齡擢其子操上第士論鄙之卒官湖南觀察使贈陝州都督溫自少天資俊拔從陸質授春秋梁肅爲詞章與韋執誼王叔文善遷左拾遺轉侍御史以剛張薦使吐蕃留於絕域故

不預貶竄之禍元和初還轉戶部員外刑部郎中其爲文富瞻
艷逸精確不苟有丘明孟堅之風所著凌烟閣功臣銘張始興
畫贊移博士書大爲流輩推尚然性愴蹢謫詭復與賈羣羊士
諤相昵薦知雜事謀逐李吉甫憲宗駭異詰辨皆誣將悉逐羣
等吉甫救免貶溫均州士諤資州皆刺史議者不厭再貶道州
徙衡州卒年四十恭尚氣節喜縱橫爲山南西道掌書記進殿
中侍御史儉亦御史讓太子右庶子

韋辭字踐之祖召卿洛陽丞父翊侍御史辭少擢明經又列入
等授校書郎辟留守韋夏卿東都從事以佐使府皆以叅畫稱
職遷藍田令治行有理元和九年入拜侍御史坐事出爲朗州
刺史貶江州司馬特與李翱相善俱擅文學高名長慶初韋處
厚路隨亟稱薦之擢戶部員外轉刑部郎中充京西北和糴使

尋改戶部兼御史中丞充鹽鐵副使轉吏部文宗卽位拜中書舍人求外爲潭州刺史湖南觀察使在鎮二年吏民稱治卒年五十八贈右散騎常侍爲人倦於潤色處事端實游官無黨然性疎達自用不事檢操頗不厭公論

宋廷芬貝州清陽人世以儒聞生五女皆警慧善屬文長若莘次若昭文尤高次若倫若憲若荀性皆潔素鄙燕鄙觀妝不願歸人欲以學名家父亦不願婚寒素聽其向學若莘誨諸妹如嚴師著文論語十篇上宗韋宣文君曹大家等推明婦道若昭又爲傳申釋之貞元中昭義節度使李抱真表其才德宗召入禁中試文章并問經史大誼亟稱其美悉留宮中因高其風操不待以妾侍咸呼爲女學士擢廷芬饒州司馬習藝館內教賜第一區加穀帛帝能詩每與侍臣賢和五人者皆預未嘗不衆

賞資若華遂承詔總領秘禁圖籍拜尚宮元和末卒贈河內郡
君若昭尤通練令嗣若華職歷憲穆敬三朝呼爲先生后妃與
諸王主率事以師禮寶曆初卒贈梁國夫人紫加南簿鼓吹若
憲代司秘書值文宗尚學聽其議論尤禮之太和中李訓鄭注
誣受宰相李宗閔厚賂以求執政帝怒幽之外第賜死家屬徙
嶺南訓注敗帝悟其讒追恨之若倫若荀早卒廷芬男獨愚不
可教爲民終身

冊曰蕭李擅稱禍變已成風槩武聞大曆縱橫盧李錢郎
並駕齊聲沿及廷芬五女著名